

- राष्ट्रपति द्रौपदी मुर्मू कह्यो— कानून रा राज मांय ई माली अर सामाजिक बरकत संभव ।
- प्रदेश रा मेडिकल कॉलेजां अर वां ऊं जुड़्या अस्पतालां मांय प्रबंधन और मजबूत बणायो जावेला ।
- प्रदेश रा वन्य जीव अभ्यारण्य चौमासा रे दौरान बंद रेहवण पाछे काल ओजू खुलेला ।
- राज्य रा ऊगणी हलकां मांय कठे-कठे आज ई बिरखा व्ही— दूजी ठौड़ां गर्मी बधी ।

000

भारतीय पुलिस सेवा (आईपीएस) रा साल 2023 बैच मांय सिखावण ले रह्या अहलकार आज राष्ट्रपति द्रौपदी मुर्मू सागे मुलाकात कीनी। ई मौके राष्ट्रपति कह्यो के भारतीय पुलिस सेवा रो खास महत्त्व है। वे कह्यो के कानून-व्यवस्था शासन रो ही नहीं बल्कि मौजूदा दौर रा राज्य रो ई आधार है। राष्ट्रपति कह्यो के माली अर सामाजिक बरकत कानून रा राज मांय ई व्हे सके है।

000

प्रदेश रा मेडिकल कॉलेजां अर वां ऊं जुड़्या अस्पतालां मांय प्रबंधन और मजबूत बणायो जावेला। चिकित्सा शिक्षा सचिव अम्बरीष कुमार आज जयपुर मांय राख्यी ज्यी खास मीटिंग मांय राज्य रा 6 मेडिकल कॉलेजां रा काम काज रो जायजो लेवण रे दौरान आ जाणकारी दीनी। वे सगळा मेडिकल कॉलेजां ऊं वां ऊं जुड़्या अस्पतालां मांय मशीना री सार-संभाल लगातार करण रा हुकम दीना।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है कौशल विकास सारू करी ज्या सरकारी फैसलां री जाणकारी—

000

उपमुख्यमंत्री दीया कुमारी आज जयपुर मांय वां रा रहवास माथे जनसुणवाई कीनी। वे अहलकारां ने जनता री परेशानियां बेगी आगी करण रा हुकम दीना। जनसुणवाई मांय जयपुर ग्रेटर नगर निगम री महापौर डॉ. सौम्या गुर्जर अर कुछ पार्षद ई मौजूद रह्या।

000

कैबिनेट मंत्री किरोड़ी लाल मीणा मुस्लिम पर्सनल लॉ बोर्ड रा राष्ट्रीय महासचिव फजल उर रहीम माथे जयपुर मांय मंदिर माफी, सिवाय चक अर पुलिस विभाग ने आवंटित करीब 1400 बीघा जमीन माथे गैर कानूनी कब्जा करण रो आरोप माण्ड्यो है। आज प्रदेश भाजपा कार्यालय मांय खबरनवीसां सागे बातचीत करता थकां वे कह्यो के ई मामला री ईडी, सीबीआई अर एसओजी ऊं जांच करा र दोषियां रे खिलाफ करड़ी कार्यवाही करी जावेला।

000

प्रदेश रा वन्य जीव अभ्यारण्य काल ओजू खुल जावेला। चौमासा री रूत मांय तीन महीन ताई बंद रह्या पाछे काल ऊं आं रे ओजू खुलण परां सैलाणियां री तादाद मांय बधोतरी रा आसार है। अलवर रा सरिस्का टाइगर रिजर्व मांय संवारे 6 बज्यां ऊं सैलाणी सैर कर सकेला। मौजूदा दौर मांय रिजर्व मांय कुल 43 बाघ-बाघिन है। म्हाणा सवाईमाधोपुर खबर नवीस बतायो के रणथम्भौर बाघ अभ्यारण्य ने निरखण सारू आया सैलाणियां रे कारण हलका मांय चहल-पहल बध गयी है।

दूजी कानी पाली मांय काल ऊं वन्य जीव रेन्ज सादड़ी अर देसूरी मांय सैलाणियां सारू सफारी सरू व्हे जावेला।

000

प्रदेश रा ऊगणी हलकां मांय कठे—कठे आज ई बिरखा व्ही। केकडी मांय आज व्ही बिरखा ऊं गर्मी ऊं साता मिली। भीलवाड़ा मांय ई सिज्यां री पोर कठे—कठे छांटो छिड़को व्ह्यो। दूजी कानी प्रदेश रा आतूणी हलकां मांय बिरखा नी व्हेवण ऊं पारो ओजू चढबा लाग्यो है। फलौदी मांय 38 दशमलव 6 डिग्री सेल्सियस तापमान दर्ज करी ज्यो। मौसम विभाग आवता दो दिन कोटा अर उदयपुर संभाग मांय कठे—कठे बिरखा रा आसार जताया है। महकमा रे मुजब 2 अक्टूबर ऊं केवल उदयपुर अर कोटा संभाग मांय कठे—कठे हल्की बारिश री संभावना है।

000

भरतपुर मांय आज क्लस्टर्ड न्याय क्षेत्र भरतपुर, धौलपुर अर करौली रा न्यायधीशों री कार्यशाला राख्यी ज्यी। राजस्थान हाईकोर्ट जोधपुर रा न्यायधिपति मुन्नूरी लक्ष्मण अर फरजंद अली रा आतिथ्य मांय राख्यी ज्यी कार्यशाला मांय पैली वाळा आपराधिक कानून भारतीय दंड संहिता अर दंड प्रक्रिया संहिता अर नुवा कानूनां रा बारा मांय जाणकारी दीरीजी। जूना अर नुवां कानूनां रो तुलनात्मक अध्ययन कर र विचार विमर्श करी ज्यो।

000

सिरोही जिला रा आबू रोड मांय प्रजापिता ब्रह्म कुमारी ईश्वरीय विश्वविद्यालय मांय राख्यी ज्यो राष्ट्रीय मीडिया सम्मेलन आज पूरो व्हे ग्यो। पांच दिन रो ओ सम्मेलन सकारात्मक पत्रकारिता माथे केन्द्रित हो। इण मांय न्यारा—न्यारा सत्रां रे मार्फत चर्चा करी ज्यी। सम्मेलन मांय देशभर ऊं मोटी तादाद मांय खबरनवीस सिरकत कीनी।

000

करगिल री लड़ाई रा नायक परमवीर चक विजेता ऑनरेरी कैप्टन योगेन्द्र सिंह यादव कोटा मांय 14 राजस्थान एनसीसी बटालियन रा संयुक्त वार्षिक प्रशिक्षण शिविर रो दौरा कीनो। शिविर मांय कैप्टन यादव रो सम्बोधन सुणबा सारू कोटा, बूंदी, बारां, झालावाड़, टोंक, चित्तौड़गढ़, अलवर, भरतपुर, करौली, गंगापुरसिटी अर सवाईमाधोपुर समेत न्यारा—न्यारा जिलां ऊं एनसीसी रा कैडेट भेळा व्ह्या। कैप्टन यादव कारगिल युद्ध रे दौरान विपरीत हालात मांय हिम्मत, बलिदान अर अटूट दृढ़ संकल्प रा वृत्तांत साझा करता थकां 500 ऊं बत्ता एनसीसी कैडेटां ने प्रेरित कीना।

000

“स्वच्छता ही सेवा” अभियान रा तैत **अजमेर** मांय आज नगर निगम री ओर ऊं नगर निगम परिसर ऊं आगरा गेट सब्जी मंडी ताई स्वच्छता रैली निकाली ज्यी। रैली मांय नगर निगम रा अहलकार, पार्षद, सफाई कर्मचारी, स्कूली विद्यार्थी अर जनता सिरकत कीनी। ई मौके मौजूद लोगों ने साफ—सफ़ाई राखण री शपथ दिरायी ज्यी। **शाहपुरा** रा राजकीय संस्कृत उच्च प्राथमिक विद्यालय रेगर बस्ती मांय साफ—सफ़ाई अर ठोस अर तरल कचरा रा निपटारा रा बारा मांय जाणकारी दीरीजी। ई मौके विद्यार्थियां ने स्वच्छता ही सेवा री शपथ ई दिरायी ज्यी। **चित्तौड़गढ़** मांय जिला कलक्टर आलोक रंजन री अगुवाई मांय आज कलक्ट्रेट परिसर मांय करीब डोढ़ घंटा ताई साफ—सफ़ाई करी ज्यी। **भीलवाड़ा** मांय गंदगी करण वाळां रा चालान कर र जुर्मानो वसूल कर्यो जा रह्यो है। **सिरोही** जिला रा राजकीय उच्च माध्यमिक विद्यालय परिसर उन्दरा मांय केंद्रीय संचार ब्यूरो, क्षेत्रीय कार्यालय सिरोही री ओर ऊं संगोष्ठी, शपथ अर श्रमदान रा कार्यक्रम राख्यी ज्यो। कार्यक्रम रे दौरान स्वच्छता

ही सेवा रा बारा मांय प्रश्नोत्तरी होड़ राख्यी ज्यी अर जीतण वाळां ने ईनाम दिया ज्यो।
सवाईमाधोपुर मांय नगर परिषद री ओर ऊं हम्मीर सर्किल ऊं सर्किट हाउस ताई **स्वभाव स्वच्छता, संस्कार स्वच्छता** थीम माथे स्वच्छता मैराथन दौड़ राख्यी ज्यी। मैराथन मांय विद्यार्थी अर जनता सिरकत कीनी।

पाली मांय जवाई बांध हलका कने बस्योड़ा गांवां मांय साफ़-सफ़ाई करी ज्यी अर रेहड़ी-पटरी वाळां ने कचरो भेळा करण रा डिब्बा दिया ज्यो अर साफ़-सफ़ाई राखण री शपथ दिरायी ज्यी।
झालावाड़ मांय संवारे **स्वभाव स्वच्छता — संस्कार स्वच्छता** थीम माथे एक घंटा रो खास सजीव फोन इन कार्यक्रम प्रसारित करी ज्यो। नगर पालिका पिड़ावा री ओर ऊं स्वच्छता ब्रांड एंबेसडर कवि मनोज निडर रे मार्फत जनता ऊं साफ़-सफ़ाई राखण री अपील करी जा रही है अर न्यारी-न्यारी ठौड़ां साफ़-सफ़ाई पाछे चित्रकारी कर र सजावट करी जा रही है। भवानी मंडी रा मेला मैदान मांय “सफ़ाई मित्र सुरक्षा शिविर” लगायी ज्यो जिण मांय सफ़ाई कर्मचारियां अर नगर पालिका रा कर्मचारियां रा स्वास्थ्य री जांच करी ज्यी।

000

प्रदेश मांय बुजुर्गा ने तीरथ करावण सारू चलायी जा रही वरिष्ठ नागरिक तीर्थ यात्रा योजना रा तैत बुजुर्गा रो चयन करण बाबत् आज न्यारी-न्यारी ठौड़ां लॉटरी निकाली ज्यी। ब्यावर मांय जिला कलेक्टर डॉ. महेंद्र खड़गावत लॉटरी निकाली। वे बतायो के ब्यावर जिला मांय कुल 1 हजार 603 अर्जियां मिली ही ज्यो मांय ऊं 61 जणा नेपाल मांय काठमांडू रा पशुपति नाथ मंदिर रा दर्शन सारू हवाई सफ़र अर 305 जणा तीरथ री दूजी ठौड़ां बाबत् रेल रा सफ़र सारू चुणी ज्यो। श्रीगंगानगर मांय जिला कलेक्टर डॉ. मंजू लॉटरी निकाली, जिण मांय हवाई सफ़र सारू 113 अर रेल रा सफ़र सारू 564 बुजुर्ग चुणी ज्यो। भीलवाड़ा मांय आ लॉटरी काल निकाली जावेला। **चित्तौड़गढ़** मांय जिला कलेक्टर आलोक रंजन लॉटरी रे जरिये 808 बुजुर्गा रो चयन कीनो। आं मांय ऊं 135 बुजुर्ग हवाई जहाज ऊं अर 673 बुजुर्ग रेलगाड़ी ऊं तीरथ सारू चुणी ज्यो। **बालोतरा** मांय जिला कलेक्टर सुशील कुमार यादव लॉटरी रे जरिये हवाई सफ़र सारू 97 अर रेल रा सफ़र सारू 486 बुजुर्गा रो चयन कीनो। **जैसलमेर** मांय जिला कलेक्टर प्रताप सिंह ई-देवस्थान पोर्टल रो बटन दबा र लॉटरी निकाली। वटे 292 बुजुर्ग रेल ऊं अर 58 बुजुर्ग हवाई जहाज ऊं तीरथ करण सारू जावेला।

000